

Conseho di Ministro a cana caminda di retiro *Y no di mocion di Parlamento*

Conseho di ministro a haci uso di e posibilidad di presenta un decreto di retiro pa ministro drs. Marisol Lopez-Tromp, na lugar di haci uso di e mocion di Parlamento, ampliamente discuti, di siman pasa diahuebs. Cu esaki, despues di e presentacion na Gobernador, el a comunica via un carta cu presidente di Staten, pa haya sa kico ta e sentimento di e organo aki tocante e intencion di retiro aki.

A tuma lugar un reunion di Centrale Commissie cu tabata convoca pa 16:00 diahuebs atardi, di unda a sali e noticia cu un mayoria di e miembronan ta bay di acuerdo cu e retiro. Decisivo tabata e posicion di e parlamentario di partido RED, Ricardo Croes, cu durante reunion siman pasa ainda no a bay di acuerdo cu e forma cu kier a pasa e mocion di desconfianza, pero awor si a bay di acuerdo cu e otro ruta aki cu a scoge pa forza un decision den e conflicto aki.

Bon Dia Aruba a consulta cu un hurista experienta den e materia aki, cu esaki ta un di e maneranan pa retira un ministro, si den seno di conseho di ministro no ta satisfecho cu e ministro en cuestion. Den un caso asina Gobernador ta consulta cu Staten pa haya sa nan opinion den e asunto. Contrario na siman pasa awor si tabatin 11 parlamentario cu tabata apoya e retiro.

Daphne Lejuez invita cu mey ora di anticipacion

Parlamentario independiente den un carta na presidente di Staten, cu copia na Gobernador di Aruba, a reacciona pa duna su punto di vista aunke na e momento ey ya caba decision a ser tuma den e reunion di Centrale Commissie. Su obheccion tabata cu el a ricibi e convocacion pa e reunion mey ora promer cu esaki a cumenza y no por a yega na tempo. Sin embargo,

den su carta el a duna su punto di vista, unda el a declara cu e no ta di acuerdo cu e mayoria cu a aproba pa Gobernador e retiro, mirando e manera cu primeramente a trata di forza un mocion di desconfianza via un minoria den Staten, “y cu awor gobierno mes, sin ningun motivacion pa cu Staten, ta skirbi un decreto di retiro pa e ministro en cuestion den un segundo intento pa saca su persona, mientras el a comparti cu Staten hopi actuacion dudoso den e diferente servicio y empresanan estatal y cu el a laga investiga tur esaki. Ta preocupante cu a strob’e di traha consistentemente, mientras net e gobierno y acuerdo di gobernacion ta maneha integridad, transparencia y gobernacion drechi como punta di lanza.”

Despues di e retiro

Manera e situacion ta na e momento aki, si Gobernador acepta e opinion di Staten manera formula despues di e reunion di Comision Central, caminda ta habri pa efectua e retiro cu e firma di Gobernador. Cu esey ta surgi e pregunta si e mandatario retira por tin opcion huridico pa apela e decision aki. Segun e opinion huridico cu nos a haya, no tin posibilidad di apelacion den corte na Aruba. Manera anuncia pa gobierno caba den e decreto, e responsabilidadnan di e mandatario lo pasa pa Promer Ministro.

Pa bolbe na e mocion di desconfianza di siman, esey finalmente no a hunga un papel den e proceso cu a encamina awor. E proceso usa awor tabata disponible caba pa e gabinete, pero no a haci uso di esaki. Aparentemente, cu e mocion inutil como base pa retiro, a haci uso di e unico caminda cu a keda habri ainda, si no tabata existi e deseo di bolbe den parlamento y hiba un proceso limpi respetando tur regla di wega, pa usa esey como base di retiro.

Potret di archivo.



Gobernador a firma e retiro di

Marisol Lopez Tromp

Argumento nobo ta e falta di homogenidad den Conseho di Minister

Prome Minister Evelyn Wever Croes ademas di su cartera di Minister pa Asuntonan General, Administracion Publico, Integridad y Energia, awor ta Minister di Ordenanza Teritorial, Infraestructura y Medio Ambiente.

Esaki ta locual Su Excelencia Gobernador Alfonso Boekhoudt a informa Presidente di Parlamento den un carta. Ta den e carta aki tambe e ta pidi pa Parlamento duna su conseho de inmediato pa asina efectua e retiro di drs. Marisol Lopez Tromp como e titular encarga cu e carteranan cu awor ta resorta bou Prome Minister.

Segun e carta di Gobernador, Prome Minister Wever Croes a manda e concept di ley unda ta retira drs. Lopez Tromp como Minister Desaroyo Teritorial, Infraestructura y Medio Ambiente, despues di apenas 9 luna den funcion.

Conseho di Minister a aproba e retiro durante su reunion di dia 21 di October 2020. E argumento ta cu funcionamiento di Gobierno ta den wega si no por garantis homogenidad di maneho di Gobierno. E ta di balor, tanto pa e Minister individual, como pa e totalidad di Ministernan, cu nan ta riba un liña y cu nan ta carga e liña aki pafo di Conseho di Minister tambe.

Alabes, Prome Minister a presenta un concepto di ley unda su persona ta keda encarga cu e cartera cu te cu ayera tabata un responsabilidad di Lopez Tromp.

Gobernador a bisa den su carta cu e ta dicidi pa retira Marisol Lopez Tromp como Minister. Y teniendo cuenta cu articulo II, 2, inciso 1 di Constitucion, su Excelencia Gobernador ta pidi Parlamento pa su opinion.

Gobernador di Aruba a ricibi concepto di decreto nacional Segun un comunicado di gabinete di Gobernador, e concepto di e decreto tabata trata retiro di minister di Desaroyo Teritorial, Infraestructura y Medio Ambiente, señora Lopez-Tromp. Conseho di minister a aproba e retiro dia 21 di october 2020.

Gobernador di Aruba a dirigi un carta ayera merdia na Presidente di Parlamento den cual a pidi pa e huicio di Parlamento tocante e intencion pa retira e minister. A pidi e huicio aki a base di articulo II.2, prome paragraf, di Constitucion di Aruba. Den e carta Gobernador ta señala cu funcionamiento di gobierno ta na peliger si no por garantis unidad di e politica gubernamental. Tanto pa e ministernan conhuntamente como pa cada minister individual ta di importancia pa, en cuanto e politica, nan ta riba e mes un liña y cu nan ta propaga of por propaga e liña ey.

